




邊裔典第四十一卷

澶洲部彙考

漢

澶洲漢時聞於中國 按漢書本紀不載 按史記淮南王傳伍被曰昔秦使徐福入海求神異物還爲僞辭曰臣見海中大神言曰汝西皇之使耶臣答曰然汝何求曰願請延年益壽藥神曰汝秦王之禮薄得觀而不得取卽從臣東南至蓬萊山見芝成宮闕有使者銅色而龍形光上照天於是臣再拜問曰宜何資以獻海神曰以令名男子若振女與百工之事卽得之矣秦皇帝大悅遣振男女三千人資之五穀種種百工而行徐福得平原廣澤止王不來 按註正義曰括地志云澶洲在東海中秦始皇遣徐福將童男女遂止此州其後復有數洲萬家其上有至會稽市易者

夷洲部彙考

後漢

夷洲後漢時聞於中國 按後漢書本紀不載 按倭國傳會稽海外有東鯤人分爲二千餘國又

有夷洲及澶洲傳言秦始皇遣方士徐福將童男女數千人入海求蓬萊神仙不得徐福畏誅不敢還遂止此洲世世相承有數萬家人民時至會稽市會稽東冶縣人有入海行遭風流移至澶洲者所在絕遠不可往來 按註沈瑩臨海水志曰夷洲在臨海東南去郡二千里土地無霜雪草木不死四面皆是山谿人皆髡髮穿耳女人不穿耳土地饒沃既生五穀又多魚肉有犬尾短如麝尾狀此夷姑舅子婦臥息共一大牀略不相避地有銅鐵唯用鹿格爲矛以戰鬪磨礪青石以作弓矢取生魚肉雜貯大瓦器以鹽鹵之歷月餘日乃啖食之以爲上肴也

吳

吳主黃龍二年遣將軍衛溫浮海掠夷洲數千人以歸 按吳志孫權傳黃龍二年春正月遣將軍衛溫諸葛直將甲士萬人浮海求夷洲及澶洲澶洲在海中長老傳言秦始皇帝遣方士徐福將童男童女數千人入海求蓬萊神仙及仙藥止此洲不還世相承有數萬家其上人民時有至會稽貨市會稽東縣人海行亦有遭風流移至澶洲者所在絕遠卒不可得至但得夷洲數千人還 按太平御覽夷洲在臨海東南去郡二千里土地無霜雪草木不死四面是山衆山夷所居山頂有越

王射的正白乃是石也此夷各號爲王分畫土地人民各自別異人皆髡頭穿耳女人不穿耳作室居衆荆爲蕃障土地饒沃旣生五穀又多魚肉舅姑男婦臥息共一大牀交會之時各不相避能作細布亦斑文刻畫其內有文章以爲飾好也其地亦出銅鐵唯用鹿脰矛以戰磨礪青石以作矢鏃刀斧鏃貫珠璫飲食不潔取生魚肉貯大器中以鹵之歷日月乃啖食之以爲上餽呼民人爲彌鱗如有所召取大空材以著中庭又以大杵旁舂之聞四五里如鼓民人聞之皆往馳赴會飲食皆踞相對鑿木作器如槽狀以魚肉腥臊安中十五五共飲之以粟爲酒木槽貯之用大竹筒長七寸許飲之歌似犬嗥以相娛樂得人頭斫去腦剝去面肉留置骨取大毛染之以作鬚眉髻編其齒以作口臨戰鬪時用之如假面狀此是夷王所服戰得勝頭著首還中庭建一大材高十餘丈以所得頭差次挂之歷年不下彰示其功又甲家有女乙家有男仍委父母往就之居與作夫妻同牢而食女已嫁皆缺去前上一齒

州胡部彙考

後漢

州胡以後漢時聞於中國 按後漢書本紀不載 按東夷傳馬韓之西海島上有州胡國其人短

小髧頭衣韋衣有上無下好養牛豕乘船往來貨市韓中 按魏志東夷傳州胡在馬韓之西海

中大島上其人差短小言語不與韓同皆髧頭如鮮卑但衣韋好養牛及豬其衣有上無下略如裸

勢乘船往來市買韓中

裨離部彙考

附養雲國

寇莫汗國

一羣國

晉

武帝泰始三年裨離諸國遣使入貢 按晉書武帝本紀不載 按東夷傳裨離國在肅慎西北馬

行可二百日領戶二萬養雲國去裨離馬行又五十日領戶二萬寇莫汗國去養雲國又百日行領

戶五萬餘一羣國去莫汗又百五十日計去肅慎五萬餘里其風俗土壤並未詳泰始三年各遣小

部獻其方物

牟奴部彙考

附模盧國

末利國

蒲都國

繩余國

沙樓國

晉

武帝太熙元年牟奴國遣使入貢 按晉書武帝本紀太熙元年二月辛丑東夷七國朝貢 按東夷傳太熙初復有牟奴國帥逸芝惟離模盧國帥沙支臣芝於離末利國帥加牟臣芝蒲都國帥因末繩余國帥馬路沙樓國帥彭加各遣正副使詣東夷校尉何龜歸化

伽羅部彙考

南齊

高帝建元元年伽羅國遣使來獻 按南齊書高帝本紀不載 按伽羅本傳伽羅國三韓種也建元元年國王荷知使來獻詔曰量廣始登遠夷洽化伽羅王荷知款關海外奉贄東遐可授輔國將軍本國王

扶桑部彙考一

南齊

東昏侯永元元年扶桑國沙門慧深至中國 按南齊書本紀不載 按梁書東夷傳扶桑國者齊永元元年其國有沙門慧深來至荊州說云扶桑在大漢國東二萬餘里地在中國之東其土多扶

桑木故以爲名扶桑葉似桐而初生如筭國人食之實如梨而赤續其皮爲布以爲衣亦以爲綿作板屋無城郭有文字以扶桑皮爲紙無兵甲不攻戰其國法有南北獄若犯輕者入南獄罪重者入北獄有赦則赦南獄不赦北獄在北獄者男女相配生男八歲爲奴生女九歲爲婢犯罪之身至死不出貴人有罪國乃大會坐罪人於坑對之宴飲分訣若死別焉以灰繞之其一重則一身屏退二重則及子孫三重則及七世名國王爲乙祁貴人第一者爲大對盧第二者爲小對盧三者爲納咄沙國王行有鼓角導從其衣色隨年改易甲乙年青丙丁年赤戊己年黃庚辛年白壬癸年黑有牛角甚長以角載物至勝二十斛車有馬車牛車鹿車國人養鹿如中國畜牛以乳爲酪有桑梨經年不壞多蒲萄其地無鐵有銅不貴金銀市無租估其婚姻婿往女家門外作屋晨夕灑掃經年而女不悅卽驅之相悅乃成婚婚禮大抵與中國同親喪七日不食祖父母喪五日不食兄弟伯叔姑姊妹三日不食設靈爲神像朝夕拜奠不制縗絰嗣王立三年不視國事其俗舊無佛法宋大明二年屬賓國嘗有比丘五人遊行至其國流通佛法經像教令出家風俗遂改 按梁四公記杰公嘗與諸儒語及方域云東至扶桑扶桑之蠶長七尺圍七寸色如金四時不死五月八日嘔黃絲布

於條枝而不爲繭脆如經燒扶桑木灰汁煮之其絲堅韌四絲爲係足勝一鈞蠶卵大如燕雀卵產於扶桑下齋卵至旬麗蠶變小如中國蠶耳其王宮內有水精城可方一里天未曉而明如晝城忽不見其月便蝕俄而扶桑國使使貢方物有黃絲三百斤卽扶桑蠶所吐扶桑灰汁所煮之絲也帝有金爐重五十斤係六絲以懸爐絲有餘力又貢觀日玉大如鏡方圓尺餘明澈如琉璃映日以觀見中宮殿皎然分明帝令杰公與使者論其風俗土地物產城邑山川并訪往昔存亡又識使者祖父伯叔兄弟使者流涕拜伏

扶桑部彙考二

山海經 海外東經

黑齒國有湯谷湯谷上有扶桑十日所浴在黑齒北居水中有大木九日居下枝一日居上枝

十洲記 扶桑

扶桑在東海之東岸岸直陸行登岸一萬里東復有碧海海廣狹浩汗與東海等水旣不鹹苦正作碧色甘味香美扶桑在碧海之中地方萬里有太帝宮太真東王父所治處地多林木葉皆如桑

又有樁樹長者數千丈大二千餘圍樹兩兩同根偶生更相依倚是以名爲扶桑仙人食其樁而一體皆作金光色飛翔空元其樹雖大其葉樁故如中夏之桑也但樁稀而色赤九千歲一生實耳味絕甘美地生紫金丸玉如中夏之瓦石狀真仙靈官變化萬端蓋無常形亦有能分形爲百身十丈者也

扶桑國



圖考

按三才圖會扶桑國在大漢國東作板屋無城郭宋武帝時屬賓有人至其國其國人養鹿爲牛取乳

扶桑部雜錄

鼠璞離騷云飲馬咸池總轡扶桑東京賦云登天光于扶桑謝莊月賦云擅扶桑于東沼嗣若英于西冥張衡思元賦憑雲遐逝夕宿扶桑東坡云一醉扶桑瞰半夜扶桑開淮南子曰日出暘谷拂于扶桑注曰東方之野山海經曰暘谷有扶桑十日所浴九日居下枝一日居上枝皆戴烏如此則扶桑在沈寥之表及觀南齊扶桑傳沙門慧深來說云扶桑在大漢東二萬里土多扶桑木葉似桐初生如筍國人食之實如梨績其皮爲布錦及紙其地乃在中國東或謂日出扶桑以日自東方出耳猶倭自謂日出處天子耳山海經多誕不足爲據楊炯渾天賦謂扶桑臨于大海李白詩謂西海栽若木東溟植扶桑竟以扶桑爲日西京賦復與濛汜對說

女國部彙考


南齊

東昏侯永元元年女國以扶桑沙門慧深聞於中國 按南齊書本紀不載 按梁書東夷傳齊永元元年扶桑國有沙門慧深來至荊州說云扶桑東千餘里有女國容貌端正色甚潔白身體有毛髮長委地至二三月競入水則任娠六七月產子女人臂前無乳項後生毛根白毛中有汁以乳子一百日能行三四年則成人矣見人驚避偏畏丈夫食鹹草如禽獸鹹草葉似薤蒿而氣香味鹹

按梁四公記梁天監中有蜀闡豳杰戮讎仇啓四公謁武帝杰公嘗與諸儒語及方域西北無慮萬里有女國以蛇爲夫男則爲蛇不噬人而穴處女爲臣妾官長而居宮室俗無書契而信呪咀直者無他曲者立死神道設教人莫敢犯南至火洲之南炎崑山之上其土人食蟪蟹髯蛇以辟熱毒洲中有火木其皮可以爲布炎丘有火鼠其毛可以爲褐皆焚之不灼汚以火浣北至黑谷之北有山極峻造天四時積雪意燭龍所居晝無日西有酒泉其水味如酒飲之能醉北有漆海毛羽染之皆黑西有乳海其水白滑如乳三海間方七百里水土肥沃犬鴨生駿馬大鳥生人男死女活鳥自銜其女飛行哺之銜不勝則負之女能跬步則爲酋豪所養女皆殊麗美而少壽爲人姬媵未三十而

死有兔大如馬毛潔白長尺餘有貂大如狼毛純黑亦長尺餘服之禦寒朝廷聞其言拊掌笑謔以爲誑妄曰鄒衍九州王嘉拾遺之談耳司徒左長史王筠難之曰書傳所載女國之東蠶崖之西狗國之南羌戎之別種一女爲君無夫蛇之理與公說不同何也公曰以今所知女國有六何者北海之東有女國天女下降爲其君國中有男女如他恆俗西南夷板楯之西有女國其女悍而男恭女爲人君以貴男爲夫置男爲妾媵多者百人少者匹夫昆明東南絕徼之外有女國以猿爲夫生男類父而入山谷晝伏夜遊生女則巢居穴處南海東南有女國舉國惟以鬼爲夫夫致飲食禽獸以養之勃律山之西有女國方百里山出台虺之水女子浴之而有孕其女舉國無夫并蛇六矣

女國



文身部彙考

梁

文身國梁時聞於中國 按梁書本紀不載 按東夷傳文身國在倭國東北七千餘里人體有文如獸其額上有三文文直者貴文小者賤土俗歡樂物豐而賤行客不齋糧有屋宇無城郭其王所居飾以金銀珍麗繞屋爲塹廣一丈寔以水銀雨則流於水銀之上市用珍寶犯輕罪者則鞭杖犯死罪則置猛獸食之有枉則猛獸避而不食經宿則赦之

文身國



圖考

按三才圖會文身國物至賤行不齋糧王居飾以金玉市用珍寶交易

豆莫婁部彙考

北魏

豆莫婁魏時聞於中國 按魏書本紀不載 按豆莫婁傳豆莫婁國在勿吉國北千里去洛六千里舊北扶餘也在失韋之東東至於海方二千里其人士著有宮室倉庫多山陵廣澤於東夷之域最爲平敞地宜五穀不生五果其人長大性彊勇謹厚不寇抄其君長皆以六畜名官邑落有豪帥飲食亦用俎豆有麻布衣制類高麗而幅大其國大人以金銀飾之用刑嚴急殺人者死沒其家人爲奴婢俗姪尤惡妬婦妬者殺之尸其國南山上至腐女家欲得輸牛馬乃與之或言本穢貊之地也

蝦夷部彙考

唐